

NEGOZIAZIO KOLEKTIBOA. Zifra ez dute aurreratu, baina %3 inguruko igoera eskatuko dute

CCOOk eta UGTk soldatak «neurritz» igotzeko aholkatuko dute aurten ere

Sindikatuok Konfederazio arteko hitzarmena hitzartu dute CEOE eta CEPYME patronalekin

Erredakzioa | DONOSTIA

Iaz bezala, aurten ere CCOO eta UGTk soldatak «neurritz» igotzeko eskaera eramango dute negoziazio kolektibora. Espainiako gizarte eragileek —sindikatuok eta CEOE-CEPYME patronalek—, Konfederazio Arteko akordioaren erre-dakzioa amaitu zuten atzo.

Ahulaldi ekonomikoari eta enpleguaren sorrerari aurre egiteko, «konfiantza seinale» bat helarazi nahi dute lau eragileok. Hitzarmena, ofizialki, datorren urtarrilaren 30ean izenpetuko dute eta abenduaren 31era arte egongo da indarrean.

Atzo idatzi zuten azken zirriborroak ekonomiaren gainbegirada zabala egiten du eta egoeraren erantzuleetako bat inflazioa dela dio: «2002ko abendurako (Espainiako) Gobernuak egindako %2ko aurreikuspena laster gaintu zen eta prezioek etengabe igotzen jarraitu zuten, urtea %4an amaitzeraino».

Inflazio aurreikuspen «sinesgarria»

Nahiz eta azken hiru urtetan joera hori errepikatu den —inflazio erreala aurreikuspenak bikoiztea—, berriro ere Madrilgo gobernuaren inflazio-aurreikuspena hartuko dute oinarritzat soldataren igoera aholkatzerakoan. «Inflazioaren aurreikuspenaren sinesgarritasuna beharrezko oinarri bat da soldaten negoziazioaren eredurako; era berean saihestu egin behar da ez dadila alde nabarmenik egon aurreikusitako datuaren



EDUARDO ABAD / EFE

UGTren arabera, berrikuspen klausulak sendotuko ditu Konfederazio arteko hitzarmenak.

eta datu erreala artean», zioen dokumentuak.

Sektore, erkidego eta probintzia mailako negoziazio kolektiboetan ere %2ko inflazio aurreikuspena hartuko dute lehen erreferentzia gisa, beraz; esparruotan, aldiz, ez CCOO-UGTk ez CEOE-CEPYMEk ez dute gomendatuko «beste parametro batzuk» kontuan hartzea.

Nahiz eta ez den zifra zehatzik aurreratu, negoziazioan parte hartu duten ordezkariak %3 inguruko soldata igoera proposatzekotan dira.

INFLAZIOA

Espainiako Gobernuaren %2ko aurreikuspena sinesgarria da patronal eta sindikatuentzat

Era berean, kasu berezitan, soldata igoera handiago bat eskatzeko prest egongo dira, beti ere «produktibitatearen igoeraren mugen barnean». «Hala, negoziatuko diren hitzarmen

kolektiboak soldataren berrikuspen klausula bat jasoko dute, baina horrek ez du esan nahi soldatak neurritz igotzeko xedea eragotziko duenik», gaineratzen zuen dokumentuak.

Horregatik, UGTren arabera, berrikuspen klausula sendotu egingo du Konfederazio arteko hitzarmenak. Sindikatuak azpimarratu zuen patronalek klausula hori ezabatu nahi zutela.

Gainera, gizarte eragileok lan berdintasunaren aldeko klausulak jasotzea gomendatuko dute baita ere.

MAKROEKONOMIA

EBZk dio «Egoera geopolitikoaren ondorioz» ekonomiak ahul jarraituko duela

Erredakzioa | DONOSTIA

Ekonomiaren indartze sendorik ez du ikusten oraindik EBZ Europako Banku Zentralak. Bere hilero txostenean azaldu duenez, «ahul jarraituko du oraindik ekonomiak, batik bat egoera geopolitiko aldatzen ez bada».

Finantza erakundearen arabera, «tentsio geopolitikoek ekonomiaren gaineko konfiantza murrizten dute, eta ondorioz, zaildu egin da indartzea».

Petrolioaren garestitzea aipatzen du tentsio horien ondorio txarren bezala. «Garestitzeak eragin zuzena izan dezake mundu osoko ekonomiaren jardueran», dio finantza erakundearen txostenak. «Baina are gehiago, etorkizunean ekoizpena murrizten bada, petrolioaren merkatuko eze-gonkortasuna ugaritu egingo da», gaineratzen du.

Euroguneko ekonomiari ere eragin egingo dio horrek, EBZren hitzetan. Halere, horri aurre egiteko gai ikusten du euroaren eremuko ekonomia. «Interes tasak jaitsita, errazago izango da oztupoak gaintzea», dio. %2,75eko interes tasa horiek egokiak iruditzen zaizkio, gainera, finantza erakundeari, eta momentuz ez du aldatzeko asmorik erakusten.

Aldaketarik ez aurreikuspenetan

Hala, aurtengorako hazkunde aurreikuspenak bere horretan utzi ditu EBZk. Bere ustez, Euroguneko ekonomia %2 eta %2,5 bitartean hasiko da 2003an, «beti ere zaila da egoera apurka desagertzen joaten bada».

Petrolioaren prezioaren bilakaerak Euroguneko inflazioa ere baldintzatuko du, EBZren arabera. «Baliteke petrolioak garestitze handiak eragitea, baina behin-behinekoak izango dira», dio erakundeak. Bere ustez, urtea amaitzerako zuzenduko dira garestitze horiek eta euroaren eremuko inflazioa %2aren azpitik mantentzea lortuko da aurten.

AERONAUTIKA. Gamesa Aeronautica eta ITPko akziodunen bat-egitearen emaitza da kontsurtzioa

Erredakzioa | GASTEIZ

Alerion talde aeronautikoa ez da sortuko momentuz. *Elmundo dinero.com* web orrialdeak atzo arratsaldean zabalduko informazioaren arabera, kontsurtzioak akziodunek (Gamesa, Sener eta SEPI) proiektua gelditzea erabaki dute eta datozen egunetan jakinaraziko dute. Aipatutako komunikabidearen esanetan, ezin izan dute akzioak banatzeko akordiorik lortu.

Gamesa Aeronauticaren eta ITPko akziodun nagusi Turbo 2000 elkartearen arteko bat-

Litekeena da akziodunek Alerion talde aeronautiko berria ez sortzea

egitearen ondorioz sortu beharreko talde aeronautiko handia da Alerion.

Iragan urteko martxoan eza-gutarazitako akordioan zehaztu zenez, Gamesak talde berriko akzioen %59 izango zituen, eta gainontzekoa Turbo 2000ren esku geratuko zen. Elkarre horretako bi akziodunek, SEPIk eta Senerrek, erdibana banatu-

ko lukete parte-hartzea. Talde aeronautikoak 700 milioiko fakturazioa izatea aurreikusi eta aurten burtsara ateratzea espero zuen. Presidente Ricardo Marti Fluxa izango zen.

Arazo ugari izan ditu, hasieratik, bat-egiteak. ITPko bigarren akziodun nagusia, Rolls Royce akzioen %46,8rekin, operatibotik kanpo geratu zen.

Alerionen sartzeko negoziazioak egin dituzte ondoren, baina azkenean bertan behera geratu ziren joan den abenduan. Ondorioz, taldearen sorrera 2003ko lehen hiruhilabetera atzeratu zen.

Politikan ere itzala izan du aferak. 2002ko martxoan talde berriak egoitza Euskal Herrian izango zuela aurreratu zen. Azaroan, aldiz, Alerion Madril kokatuko zela jakinarazi zuten. Erabakiak Eusko Jaurlaritzaren, aldundien, sindikatuen eta Confeskasken kritikak jaso zituen.